

**HOTUBA YA MKUU WA WILAYA KWENYE KIKAO CHA KAMATI YA
AFYA WILAYA KUHUSU CHANJO YA SARATANI YA MLANGO WA
KIZAZI; 25 MEI 2018**

- Katibu Tawala Wilaya,
- Mganga Mkuu wa Wilaya
- Mkurugenzi mtendaji wa Halmashauri ya Wilaya
- Maafisa Elimu wa Wilaya
- Viongozi wa madhehebu ya dini
- Mabibi na Mabwana

Ndugu Wajumbe

Awali ya yote,napenda kumshukuru Mwenyezi Mungu kwa kutujalia uzima na afya njema na kutuwezesha sote kuwa hapa siku ya leo. Pili napenda kuwashukuru,kwa kujumuika sote katika kikao hiki muhimu na wadau wa chanjo katika Wilaya yetu.

Ndugu Wajumbe

Wizara ya Afya, Maendeleo ya Jamii, Jinsia, Wazee na Watoto kwa kushirikiana na wadau wa chanjo tumeambiwa itaazisha chanjo mpya ya kuwakinga na ugonjwa wa saratani ya mlango wa kizazi kwa wasichana wenye umri wa miaka 14 kuanzia mwezi April,2018 nchi nzima. Serikali imeamua kuanza kutoa chanjo hii kwasababu saratani ya mlango wa kizazi ndiyo inayoongoza kwa kuuwa wanawake wengi ukilinganisha na saratani nyingine hapa Tanzania.

Ndugu Wajumbe

Saratani ya mlango wa kizazi inachangiwa na vitu vingi ikiwemo kuanza kujamiana katika umri mdogo,kuwa na wapenzi wengi,kuwa na ndoa za matala,kuzaa watoto wengi, na vutaji wa sigara.Dalili za saratani ya mlango wa kizazi mara nyingi hujitokeza ikiwa imeshasambaa mwilini.Zifuatazo ni baadhi ya dalili za saratani mfano; kutokwa damu ya hedhi bila mpangilio,kutokwa damu baada ya kujamiiiana,maumivu ya mgongo, miguu na/au kiuno,kuchoka, kupungua uzito, kupungukiwa au kokosa hamu ya kula,kutokwa uchafu wa rangi ya kahawia au wenye damu kwenye uke,maumivu ya miguu au kuvimba

Dalili mbaya zaidi zinazoweza kujitokeza ni pamoja na kuishiwa damu, figo kushindwa kufanya kazi, kupatwa na fistula, na uvimbe wa tezi.

Ndugu Wajumbe

Lengo hasa la kuanzisha chanjo hii ni kukinga mabinti wetu kutokana na madhara makubwa yanayoweza kuwapata ambayo husababisha vifo vingi kwa wanawake, na hivyo kuboresha afya za jamii ya wanawake Watanzania kwa ujumla. Uanzishwaji wa chanjo hii utahusisha pia Mkoa wetu.Walengwa wa chanjo hii kwa mwaka huu wa 2018 ni wasichana wote wanaotimiza miaka 14, ambao kwa wilaya yetu ya Mpwapwa tunatarajia kuchanja mabinti wapatao 4046.

Ndugu Wajumbe

Tunapaswa kujua namna ya kujikinga na Saratani ya mlango wa kizazi.Njia yakwanza ni kupata chanjo ya kuzuia saratani ya mlango wa kizazi,

kutokufanya ngono katika umri mdogo, kuepuka kubeba mimba katika umri mdogo, kuwa na mwenzi mmoja mwaminifu, kutumia kondomu na kuepuka uvutaji wa sigara. Njia ya pili ni Kufanya uchunguzi wa kina ili kubaini dalili za awali na kupata matibabu stahiki mapema. Na njia ya tatu ni kupata matibabu maalum kwa mtu ambaye tayari amepata saratani ya mlango wa kizazi.

Ndugu Wajumbe

Napenda pia niwataarifu mkakati utakaotumika katika utoaji wa chanjo hii. Kutokana na uzoefu uliopatikana wakati wa majaribio ya utoaji wa chanjo hii Mkoani Kilimanjaro,chanjo hii itatolewa katika utaratibu wa kawaida katika vituo vyetu vya kutolea huduma za chanjo, baadhi ya shule zitakazochaguliwa, na baadhi ya maeneo katika jamii ambapo zitatolewa kwa njia za huduma za mkoba.Huduma hizi zitatolewa bila malipo katika vituo vya kutolea huduma za afya vya serikali na binafi.Wizara yetu kwa kushirikiana na wadau tumejipanga vizuri kuhakikisha watoto wetu wanaondokana na tatizo hili.

Ndugu Wajumbe

Napenda kuipongeza Wizara ya Afya, Maendeleo ya Jamii, Jinsia, Wazee na Watoto kwa kushirikiana na wadau mbalimbabali katika jitihada za kuboresha afya ya mabinti hapa Nchini ikiwepo kupunguza vifo vitokanavyo na saratanikwa kuanzisha chanjo dhidi ya ugonjwa wa saratani ya mlango wa kizazi.Tunafahamu kuna changamoto nyingi katika mapambano dhidi ya saratani. Tunajaribu kukabiliana na changamoto zilizopo, ili kusimamia na kuboresha Afya ya Watanzania.

Ndugu Wajumbe

Nchini Tanzania, saratani ya mlango wa kizazi ni ya kwanza kwa vifo ikifuatiwa na saratani ya matiti. Saratani hizi mbili kwa pamoja husababisha zaidi ya asilimia 50 ya vifo vyote vya akina mama vitokanavyo na saratani. Idadi hii ni kubwa sana, hivyo juhudi na ushirikiano zaidi vinahitajika katika kupunguza vifo hivi.

Ndugu Wajumbe

Ombi kubwa la serikali ni kuwaomba wadau wetu wote mliopo hapa mtusaidie kupeleka ujumbe huu wa kuanzishwa kwa chanjo ya saratani ya mlango wa kizazi kwa mabinti wa miaka 14 ili waweze kukingwa na madhara makubwa yanayoweza kuwapata hapo baadae ya kuugua kwa maumivu makali sana na hatimaye kifo. Wengi wetu tumetembelea Ocean Road na kuona jinsi jamaa zetu wanavyopata mateso makali.

Ndugu Wajumbe

Serikali inawaomba wananchi wetu wawahimiza walengwa wote kufika katika kituo cha kutolea huduma za chanjo na akina mama nao wajitokeze kwa wingi ili waweze kufanyiwa uchunguzi dhidi ya ugonjwa wa saratani, kwa kufanya hivyo kutasaidia kuwakinga na magonjwa na vifo, hii itaiwezesha Serikali kutumia fedha ambazo zingetumika kugharamia matibabu zitumike katika miradi mingine ya maendeleo. Kwa kuwa chanjo ni uwekezaji katika uchumi wa Taifa, serikali hutoa chanjo hizi bila malipo katika vituo vyote vinavyotoa huduma za chanjo vikiwemo vya serikali, binafsi, Mashirika ya dini na yasiyo ya kiserikali.

Naomba nihitimishe kwa kuwahakikishia wananchi kuwa chanjo zinazotolewa katika vituo vyetu ni salama, hutolewa na wataalamu wenye uzoefu mkubwa waliobobea katika fani hii kwa muda mrefu.

Mwisho napenda niwashukuru wote kwa kufika katika kikao hiki muhimu.

Baada ya kusema hayo naomba kutangaza kuwa kikao chetu cha kamati ya huduma ya Afya Wilaya juu ya chanjo ya saratani ya mlango wa kizazi kimefunguliwa rasmi.

ASANTENI SANA KWA KUNISIKILIZA;